

Mud Volapüka

Nüm 68

4 gustul 2017

Bukemaboed

Fövot lekoned-mära yutopik
„Ventürs hiela ‚Nenolikan‘ e flenas omik“
fa hiel „N. N. Nosov“

Kapit degjolid. Pö ‚Kaitöp‘.

Zif Kaitöp ätopon tö sabajol, nilü flumed. Bims no äglofons is, klu no äbinos so jöniko pö süts äs pö süts Grünazifa. Ab flors mödik äglofons zi, leigoäs pö Florazif. Doms äbinons vemo jöniku is. Tipot pideköl u me higok boadik, kel ätulon äl flans valasotik [difik] ma lüod viena, u me viena-mül [grainöp vienik] pledadinik daduliko tulöl älöon sus nuf alik. Vienamüls mödik at älabons krotis boadik, kels äkrotons nenropiko. Kaitis ai ävebons zi sus zif. Kaitön [tovön kaiti löpio ini lut] äbinon yofu löfikün lödanas, demü kel zif ga idageton nemi okik. Kaitis at päblimons me brum-öms patädik. Binod brumöma binon vemo balugiku. Binädon me strip papüra komunik petenidüköl ve kedül. Strip papüra at pamufükon fa vien, be-tonölo toni noidülöl u brumöl vemo neplitiko.

Brum plu-vögedik kaitas äkobioflumon [äyumon] ko knätär krotas vienamülik, sekü atos bruid nenropik ätonon love zif.

Fenäts doma alik pälabükons me kläpedes treilik patädik. Ven futaglöpäd, kel koo vemo äpliton zifanis, äjenikon pö süts zifa, täno kläpedes pö doms



pämaifükons. Kläpedes pimenodöls treilik at äkoedons dranön liti saidik ini cems e id ottimo äjelodons legudiko vitüris ta futaglöp, kel sekü kods klänöfik ai juton no äl lüod flagabik, ab ebo lü vitür.

Eduvegölo da süt löpik, tood eflekon oki ad lael [lusüt] ed estopikon lä leyan boadik labü kläpedil. Sus leyan tipot boadik älöon, löpo pideköl me glätaaglöp nidöl, pö kel, äsif pö lok, süt lölik älokon güflekiko [pegüükölo] kods, kiuds e tood elüvegöl lü leyan.

Stiran, kel reto pänemom: ‚Luibül‘ < esexämom se tood ed, elügolölo lü kläpedil, epedom gnobi piklänedöl pö kiud.

Kläpedil emaifikon seiliko [nennoidiko].

„Nügolsös.“ - Luibül evüdom Skrubüle e Lebuonüle. - „Ukosükob olis ko Boadaskrubül. Etan binom pösodu nitedik. Ols it usüadikols kol om.“

Flens kil enügoloms ini yad ed, eflekölo oki nedetio, älütevoms lü dom. Ebexänölo tridemi stonik smalik, Luibül etuvom gnobi pö völ ed epedom oni. Yan emaifikon koo seiliko, e flens obsik ereafoms cemi.

Cem äbinon go vagiku: nen möbs, plä hamak lagöl len völ, pö kel lövikan lenlabü klotäd [vobaκlotem] blövik äseatom, eflegölo lögis ad jöled ed esteigölo dibiko namis ini poks.

„Jünu laiᵛslipol-li, o Boadaskrubül?“ - Luibül eglidom etani. - „Ga göd komon ya lunüpo.“

„Leno slipob, ab tikob“ - Boadaskrubül egesagom, lüflekölo kapi äl visitans okik.

„Ekö!, kosükolös oki ko mastans: Skrubül e Lebuonül. Neodoms soldaferi.“

„Glidö! Begö! seidolsös olis“ - Boadaskrubül egesagom.

Skrubül e Lebuonül ezilogedoms bluviko, no



küpölo pö cem lölik seimosi, sui kel ämögösöv ad seidön oki, ab Boadaskrubül etenükom nami ed epedom gnobi komöl len völ lä hamak. Sunädo völa-seadöps kil, pimeköl leigoäs völaseadöps teatik, emaifikons pö völ visoik. Skrubül e Lebuonül eseidoms oki.

„Eküpols-li, das valikos obik pa-tölaton me gnobs?“ - Boadaskrubül esäkom. - „If pedön gnobi bal - täno yan pukuedon maifikön, if pedön votiki - täno völaseadöp umaifikon, ab if neodoyöv tabi, täno ekö!...“

Boadaskrubül epedom gnobi votik. Taba-tegot edeflekon oki dese völ e ti eflapom len koap Skrubüli äseadöl su seadöp.

„Vemo kovenik, vo-li?“ - Boadaskrubül esäkom.

„Lebenö!“ - Skrubül esiom ed ezilogedom, dredölo: bis nog seimos no do-fal-on-öd sui kap omik.

„Kaen magälik kion!“ - Boadaskrubül esagom pleidülo.

„Töbot te balik dabinon, das mögos ad seadön te len völ“ - Luibül esagom.

„Ebo ätikom dö mod: kisi dunön, dat omögös ad mufilön seadöpis“ - datikan egesagom.

„Bo, gudikumo-li ad mekön stulis komunik?“ - Skrubül esagom.

„Atos binon tiketu gudik! Onedos ad datikön stuli ebo komunik!“ - Boadaskrubül efredikom. - „Ga valikos letälenik binon komunik. Bo, koo binol-li kaenalu, o kompenan?“

„Si“ - Skrubül egesagom. - „Obs bofik binobs kaenalus.“

„So, neodols-li soldaferi?“

Boadaskrubül epedom gnobi nog bal, e hamak eprimon ad donikön, stunükölo votikanis. Ädonikon jüs Boadaskrubül, äseatöl su on, ereafom löliko gluni.

„Nexänölo se hamak



komunik, mögos ad brulikön me lög pö jains ed, efalölo, viodön nudi okik“ - Boadaskrubül esagom, löädölo se glun. - „Vio logols, riskäd at pimoükon löliko pö hamak cinädik obik. Nentupiko donikoy sui glun, pas täno löädoy. Leigo, ven nedoy seitön oki [ad slipön], täno seitoy oki sui glun, pedoy gnobi, e hamak itjäfidiko tovon utani ad geilot flagabik.“

Boadaskrubül eprimom ad zigolön pö cem e pedön gnobis valasotik, sekü kelos tabs, seadöps e boeds nuliks, ä kläpedils ramaras e stokacemil as valasotiks ämaifikons. Fino epedom gnobi nog bal ed eduafalom ini cem disteadik.

„Gololsös isio!“ - vog oma petonon dese yad pos minut bal.

Flens segoloms ini yad.

„Labob garadi is“ - Boadaskrubül esagom, lü-dugölo Skrubüli e Lebuonüli lü stona-barak ko yan ferik vidik.

Epedom gnobi, e yan äsleafon löpio äsvo körten teatik. Tood nenotik labü luibs mödik ästadon pödü yan.

„Atos binon toodu jöl-luibik stemik ko koldülükam pistagik“ - Boadaskrubül eplänom. - „Labon luibis fol dono e foli - löpo. Kösömiko tood mufon pö luibs donik; luibs löpik piläükons demü jenot üf tood güflekikon. Luibs jöl valik pipladon lästenaguliko, demü kelos tood kanon mufön noe kösömiko leigoäs toods komunik, abi pö flan u igo löp okiks, sevabo ebo güflekiko. Kludo mijenots alseimik pa-büo-ne-let-ons.“

Boadaskrubül enüdranom ini tood ed edajonom vabami pö stads fol valik, pas pos äfövom plänis okik.

„Pla cub komunik“ - esagom - „caf pro vamükam karbatazüdavata komon pö tood. Stem, süiköl pö vamükam vata, gretükumön pedi ta sleifa-zilid, dub kelos luibs tulons vifikumo. Pödü caf



bük komon pro kvisin pistaga=gladeta zesüdöl ad koldülükön zilidi. Gladet esmetöl dub koldülükam dranon ve rüdil ini caf e smivon motori. Tood labon spidis fol: balid, telid, kilid e folid<, ä mufis moik [pödio] e flanik [flanio]. Parat pro stofädemi=lav komon pödo pö tood. Lavam kanob paduionon timü mufam ön spid alik. Ön stad takik, sevabo timü stebs, tood cöpon ad boads, knideton [migon] taimi e vobädon bakastonis, ä säjalon pötetis.“



Ästunölo dö tood küpädik at, flens elütevoms ini voböp Boadaskrubüla, kel pä=bepladon me vorotem valasotik. Saikuls, diladils saikulik, tridavegöms ä tupits e tul=öms boadiks mödiks valasotiks: voriks e dädik< äseatons is. Boadaskrubül lunüpo äziglibom pö voböp, sukölo soldaferi, ab ut änekomon valöpo. E=fi=dasukölo vorotemi okik, süpo enokom flomi okik me palm ed esagom:

„Kofudanu kionu binob! Ga iglömöb soldaferi pö hiel ‚Sagat=an‘. Mutols lütevön lü Sagatan ad soldafer.“

„Benö! Ureafobs usio ünü brefüp pö tood“ - Luibül esagom.

„Ab kimu binom Sagatan at?“ - Skrubül esäkom, kü flens obsik segoloms plödio, eleditölo de Boadaskrubül.

„Sagatan binom penanu“ - Luibül egesagom.

„Vö-li?“ - Lebuonül evokädom. - „Obinos vemo nitediku ad kosikön ko etan. No balna äspikotob ko penan legik.“

„Üfo ukosikols ko utan. Koo binom pösodu nitedik.“ - Luibül egesagom, seidölo oki ini tood.

Reidolsös fövoti konota pö nüm fovik.